

Uumassusilinnit isumalluutit niuernermi ilisimatusarnermilu atorneri pillugit Inatsisartut inatsisaat nr. 20, 20. november 2006-imeersoq Atuussimasoq (Historisk)

Kapitali 1

Siunertaa, atuuffia aamma nassuiaatit

Siunertaa

§ 1. Uumassusillit assigiinngisitaarnerat pillugu isumaqatigiissut naapertorlugu inatsisip siunertarai:

- 1) Uumassusilinnit isumalluutit Uumassusillit assigiinngisitaarnerat pillugu isumaqatigiissut naapertorlugu ilisimatusarfigineqassasut.
- 2) Ilisimatusarnikkut paasisatigut angusat atorineqassasut niuernermi iluanaarutigalugu iluaqutiginninniarnermut..
- 3) Kalaallit Nunaat uumassusillit tunngavigalugit iluaquteqarnerup pilersitaanit naammaginartumik pissarsissasoq.
- 4) Uumassusilinnit isumalluutit atorineqassasut avatangiisinut pinngortitamullu illersorneqarsinnaasumik.

Atuuffia

§ 2. Inatsit atuuppoq pineqartuni ukunani:

- 1) Suugaluartulluunniit uumassusilinnit isumalluutininik niuernermi aamma ilisimatusarnermi siunertarisanut pissarsiniartarnerit, katersuisarnerit, atuisarnerit pineqartunillu annissuisarnerit pineqarpata.
- 2) Misissuinermi ilisimatusarnermilu paasisatigut angusanik naqitanngorlugit saqqummiineq aammalu uumassusilinnit isumalluutininik patent´iliisarneq pineqarpata.
- 3) Pineqartuninik niuernermi siunertarisanut allatigut atuinerit aammalu uumassusilinnit isumalluutininik piiiaanikkut taakkuluunniit tunngavigalugit nioqqutissiat pineqarpata.

Imm. 2. Inatsit inunnit uumassusilittut isumalluutit atornerinut atuutsinneqanngilaq.

Imm. 3. Inatsit pinngortitami isumalluutininik nalinginnaasumik aamma teknologii atorinagu iluaquteqarniarnermut atuutsinneqanngilaq, soorlu qangatut pisarnertut piniarnermik, aalisarnermik nunalerinermillu iluaquteqarniarnermut aammalu naasunik assigisaannillu pinnersaatissanik imaluunniit nerisassiassanik katersuisarnernut.

Imm. 4. Naalakkersuisut qinnuteqartoqareerneratigut immikkut akuersissuteqarsinnaapput inatsisip ilisimatusarnikkut siunertanut aalajangersimasunut atorineqarsinnaanissaanik.

Nassuiaatit

§ 3. Inatsimmi matumani makku ima paasisassaapput:

- 1) Umassusilinnit isumalluutit: Umassusillit sananeqaataasigut kingornuttagaasunik isumalluutit, uumassuseqartut taakkuluunniit pisataat suulluunniit, uumassusilinneersut ataatsimoortuisa ilaat imaluunniit uumassusillit avatangiisillu imminnut sunniuteqaqatigiittarneranni uumassusiliussinnaasut suugaluartulluunniit nunarsuarmioqatigiinnit maannakkut siunissamiluunniit iluaqutiginiarneqarsinnaasut naleqarsinnaasulluunniit.
- 2) Misissuinissamut akuersissut: Umassusilinnit isumalluutit pissarsiniarnissamut, katersuisinnaanissamut imaluunniit uumassusilinnit isumalluutit ilisimatusarnikkut imminnut attuumassuteqarnerannik misissuinissamut akuersissut, pisariaqartinneqassappat kingusinnerusukkut niuernermi siunertarisanut atuisoqarnissaa siunertaralugu. Niuernermi siunertarisanut atuisoqartinnagu, tak. nr. 3, piunasaqaataavoq misissuinissamut akuersissuteqaqqaartoqarsimassasoq.
- 3) Niuernermi siunertarisanut atuineq: Umassusilinnit isumalluutit nioqqutissiaasimasunik nioqqutissiorneq tunianiaaqqinnerluunniit aammalu uumassusilinnit isumalluutit pillugit taakkuluunniit tunngavigalugit patent-imik qinnuteqaatinik patent-iliissutinilluunniit tuniniaaqqittarnerit.
- 4) Niuernermi siunertarisanut akuersissut: Akuersissut uumassusilinnit isumalluutit aamma uumassusilinnit isumalluutit tunngavigalugit misissuinermi paasisatigut angusanik niuernermi siunertarisanut atuisinnaatitsissutaasoq.
- 5) Iluaquteqarniarnermut ingerlatseqatigiiffik: Suliffeqarfik, Kalaallit Nunaata uumassusilinnit isumalluutit pillugit piginnaatitaaffigisaanik Naalakkersuisut sinnerlugit nakkutilliillunilu aqutsisuusooq.

Kapitali 2

Iluaquteqarniarnermut ingerlatseqatigiiffik aamma paasisimasallit

§ 4. Naalakkersuisut piginnaatinneqarput Kalaallit Nunaata uumassusilinnit isumalluutit pillugit pisinnaatitaaffigisai atorlugit iluaquteqarniarnermut ingerlatseqatigiiffimmut amerlanerusunulluunniit aallaqqaatit akiliuteqarsinnaanissamik. Iluaquteqarniarnermut ingerlatseqatigiiffik pisinnaatitaaffigisanik niuernermi siunertarisanut tunngavigalugit aqutsinissamut kisermaassisinnaatitaanissamik tunineqarsinnaavoq. Naalakkersuisut iluaquteqarniarnermut ingerlatseqatigiiffiit taakkulu ingerlatsinissaat pillugit sukumiinerusunik maleruagassiinnaapput. Imm. 2. Kalaallit Nunaata pisinnaatitaaffigisaanik iluaquteqarniarnermut ingerlatseqatigiiffimmut aallaqqaatit akiliuteqarneq, tak. imm. 1, killigaavoq ukiuni qulini atuuttussatut. Naalakkersuisut piffiup pineqartup piffimmut ataatsimut ukiut qulit tikillugit sivitsorneqarsinnaaneranik periarfissaqartinneqarput, tamatuma ingerlanerani angujumasat sukumiinerusumik isumaqatigiissutaasimasut piffiup pineqartup iluani anguneqarsimappata. Naalakkersuisut aallaqqaatit akiliuteqarneq, piffissamik killiliisinnaaneq aamma angujumasat pineqartut pillugit sukumiinerusunik maleruagassiinnaapput.

Imm. 3. Naalakkersuisut iluaquteqarniarnermut ingerlatseqatigiiffik piginnaatissinnaavaat uumassusilinnit isumalluutit niuernermi siunertarisanut tunngaveqartumik nammineerluni atuiniansinnaanissaanik taamatullu uumassusilinnit isumalluutit Kalaallit Nunaat sinnerlugu niuernermi siunertarisanut atuinissamut atatillugu niuernermi siunertarisanut akuersissutinik tuniniaasinnaasarnissaanik, tak. § 10.

§ 5. Naalakkersuisut, pisariaqarsorigunikku, misissuinissamut akuersissutinik qinnuteqaatit suliarineqarnissaannut atatillugu paasisimasalinnik ikiortissarsiorsinnaapput. Misissuinissamut akuersissutinik inaarutaasumik aalajangiineq Naalakkersuisunit isumagineqartarpoq.

Imm. 2. Naalakkersuisut paasisimasalinnik toqqaasarneq pillugu maleruagassanik sukumiinnerusunik aalajangersaasinnaapput.

Imm. 3. Naalakkersuisut misissuinissamut akuersissutinik qinnuteqaatit suliaqartarnerannut atatillugu akiliuteqartitsisarneq pillugu maleruagassanik sukumiinnerusunik aalajangersaasinnaapput.

Imm. 4. Allaffissornikkut suliaasaasartut pissutigalugit piumasaqaatigineqarsinnaavoq misissuinissamut akuersissutinik qinnuteqaateqarnermut atatillugu apeqqutinut immersuiffiliap pineqartumullu atugassiap atorineqartarnissaa.

Kapitali 3

Misissuinissamut akuersissutit

§ 6. Uumassusilinnit isumalluutinik ilisimatusarnermut imaluunniit malitsigisaanik niuernermit iluaqutiginiarnissaannut atatillugu pissarsiniartarnerit, katersuisarnerit misissuisarnerillu suulluunniit aatsaat pisinnaapput misissuinissamut akuersissummik pissarsereersimagaanni.

Imm. 2. Misissuinissamut akuersissummik tunniussisinnaanermut atatillugu piumasaqaataavoq qinnuteqaateqartup Uumassusillit assigiinngisitaarnerat pillugu isumaqatigiissut malillugu uumassusillit sananeqaataasigut kingornuttagaasunik isumalluutit niuernermit iluaqutiginiarnissaannut maleruagassanik malittarinninnissaa aammalu Naalakkersuisut uumassusilinnit isumalluutit pillugit pisinnaatitaaffiannik ataqqinninnissaa.

Imm. 3. Naalakkersuisut taamatut qinnuteqaateqartoqarpat niuernermit atuisinnaatitaaffiusussaannngitsumik misissuinissanut atatillugu misissuinissamut akuersissuteqarsinnaapput. Misissuinerit pineqartut tunngavigalugit paasisatigut angusat kingusinnerusukku niuernermit iluaqutiginiarneqassappata, tamanna § 9 naapertorlugu aalajangersakkat aqqutigalugit pissaaq.

Imm. 4. Naalakkersuisut misissuinissamut akuersissutit pillugit malitassanik aalajangersaasinnaapput, tamatumani pingaartumik pineqartillugit avatangiisit pinngortitallu sapinngisamik annertunerpaamik mianerineqarnissaat, sumiiffiit katersuiffiusussat pillugit aammalu uumassusilinnit isumalluutinik katersuisarnermut atatillugu suut peruserineqartarsinnaanerat pillugit malitassat, kiisalu nalunaarusiortartussaataanerit aammalu misissuinissamut akuersissut tunngavigalugu ilisimasarilikkat piginnaatitaassutsimik piginnittup nammineq atornianngippagit Naalakkersuisunut imaluunniit iluaquteqarniarnermut ingerlatseqatigiiffimmut piginnaatitaassutsimik tunniussisarnissaa pillugit malitassat.

Imm. 5. Naalakkersuisut misissuinissamut akuersissuteqarnerminnut atatillugu, qinnuteqaateqartumut, misissuinissamik akuersissummut atatillugu killissarititaasussat atuinissallu pillugit, eqqartuussissutigoortumik nammineq isumaqatigiissummik isumaqatigiissusiorsinnaapput.

Imm. 6. Misissuinissamut imm. 2 naapertorlugu akuersissut killilimmik piffissalikkatut tunniunneqartarpoq. Misissuinissamut akuersissutip atuuffia qaangiukkaangat akuersissut atorunnaartarpoq sivitsorneqarsimanngikkuni.

Imm. 7. Uumassusilinnit isumalluutit atuinermi sumiiffigisamik suunerannilluunniit allannguinerit suulluunniit, aamma katersuinermit peruserisat allangortinneqassappata, taakku aatsaat pisinnaassapput misissuinissamut akuersissummik nutaamik pissarseqqaarluni.

Imm. 8. Misissuinissamut akuersissut naapertorlugu pineqartunik pissarsiniartarnermut, katersuisarnermut misissuisarnermullu aningaasartuutaasinnaasut qinnuteqaateqartumit akilerneqassapput.

Imm. 9. Naalackersuisut imaluunniit aqutsinermit ingerlatseqatigiiffik, pineqartumut atatillugu piginnaatinneqarsimasoq, paasissutissanik pisariaqartinneqartunik piniarsinnaapput qinnuteqaateqartumut allanulluunniit.

Imm. 10. Misissuinermit atorineqartunik imaluunniit misissuinermit paasisatigut angusanik inummut allamut tamakkiisumik ilaannakortumilluunniit tunniussineq atugassiinerluunniit sugaluartoq aatsaat pisinnaavoq Naalackersuisut pineqartoq pillugu akuersissuteqareersimappata.

§ 7. Naalackersuisut iluaquteqarniarnermut ingerlatseqatigiiffimmut ilisimatitsissuteqartassapput misissuinissamut akuersissummik kina tunineqarsimanersoq pillugu, taamaasilluni iluaquteqarniarnermut ingerlatseqatigiiffiup pineqartunik akuersissutit nuerutigineqarsinnaasunik pisiumasinnaasut attavigisinnaasassammagit.

Kapitali 4

Misissuisarnikkut paasisatigut angusanik il.il. saqqummiussisarneq

§ 8. Kinaluunniit uumassusilinnit isumalluutit tunngavigalugit misissuinermit paasisatigut angusanik taakkuluunniit ilaannik eqqartuisoqalersinnagu, kingusinnerpaamillu naqitanngorlugit saqqummiunneqartinnagit pisussaaffeqarpoq, pineqartut pillugit ilisimatitsissuteqassallutik Naalackersuisunut, taassuma ilisimangippagu, Naalackersuisut ilisimatinneqareersimasut. Pineqartunik naqitanngorlugit saqqummiineq allatigulluunniit tamanut saqqummiussineq taamaattoq pisassaaq Kalaallit Nunaata uumassusilinnit isumalluutit pillugit pisinnaatitaaffigisai ataqqillugit, aammalu Uumassusillit assigiinngisitaarnerat pillugu isumaqatigiissummi aalajangersakkat malillugit, innersuussutigalugulu pineqartut atorineqartut Kalaallit Nunaanni aallaaveqartut.

Imm. 2. Naqitanngorlugit saqqummiussat uumassusilinnit isumalluutit taakkuluunniit tunngavigalugit imallit assilineri Naalackersuisunut nassiunneqassapput. Apersuisarnertigut imaluunniit oqaasiinnartigut paasisat pissarsiallu Naalackersuisunut ilisimatitsissutigineqartassapput imaqarniliannorlugit imaluunniit pineqartut pillugit naalisakkamik nalunaarusiaralugit.

Imm. 3. Naalackersuisut iluaquteqarniarnermut ingerlatseqatigiiffik ataavartumik ilisimatittarumaarpat misissuinermit paasisatigut angusanik tamakkiisumik ilaannakortumilluunniit saqqummiussisoqassamaarnera allatigulluunniit atugassiissoqassamaarnera pineqartillugu imaluunniit nassaat eqqartuiffigineqarnissaat pineqartillugu. Imm. 4. Naalackersuisut imaluunniit iluaquteqarniarnermut ingerlatseqatigiiffik naqitanngorlugit saqqummiinissaq allatigulluunniit tamanut saqqummiussinissaq pillugit tunngavissianut tunngasumik eqqartuussissutigoortumik nammineq isumaqatigiissummik kikkunnulluunniit isumaqatigiissusiorsinnaapput.

Imm. 5. Naalackersuisunut kinaluunniit imm. 1 aamma 2 malillugit paasissutissiisussaataasoq pisussaavortaaq misissuinermit paasisatigut angusanik, nasaanik taakkuluunniit ilaannik

naqitanngorlugit saqqummiutilersaakkat pillugit patent-imik allatigulluunniit misissuinermi paasisatigut angusat illersuutissaannik qinnuteqalersaartoq paasissutissiinissaminik.

Kapitali 5

Paasisatigut angusanik il.il. patent'iliisarneq

§ 9. Kinaluunniit misissuinissamut akuersissummik peqartoq, taamatullu misissuinissamut akuersissutini tunngavigalugu nassaani pillugu patent'imik qinnuteqarniartoq patent-iliiniarneq pillugu Naalakkersuisunut paasissutissiisussaataavoq. Paasissutissaatitanerup malitsigaa patent-iliinissamik qinnuteqaatip assilineri Naalakkersuisunut nassiunneqartassammat, kingusinnerpaamik patent'iliinissamik qinnuteqarnermut atatillugu.

Imm. 2. Naalakkersuisut iluaquteqarniarnermut ingerlatseqatigiiffik ilisimatittassavaat kikkut paasisatigut angusaminnik patent-iliisoqarnissaannik qinnuteqaateqarniarnerannik, taamaasillugu iluaquteqarniarnermut ingerlatseqatigiiffiup niuernermi siunertarisanut akuersissutinik qinnuteqarumaarsinnaasut attavigisinnaasassammagit.

Kapitali 6

Niuernermi siunertarisanut atuineq

§ 10. Umassusilinnit isumalluutinik tamakkunangalu paasisatigut angusanik niuernermi siunertarisanut atuinissaq sunaluunniit pitinnagu piumasaqaataavoq niuernermi siunertarisanut akuersissummik iluaquteqarniarnermut ingerlatseqatigiiffimmit pissarsereertoqarsimanissaa. Akuersissummik tunniussineq pissaaq niuernermi siunertarisanut akuersissutinik siusinnerusukkut tunniussisareernerit ataqqillugit.

Imm. 2. Niuernermi siunertarisanut akuersissummik qinnuteqaat iluaquteqarniarnermut ingerlatseqatigiiffimmut allaganngorlugu tunniunneqassaaq.

Imm. 3. Naalakkersuisut imaluunniit iluaquteqarniarnermut ingerlatseqatigiiffik tamatuminnga piginnaatitaasoq niuernermi siunertarisanut akuersissutip atornissaanik malitassat sukumiinerusut pillugit eqqartuussissutigoortumik namminneq isumaqatigiissusiorsinnaapput, taamatullu aamma patent-imik piginnittumut patent'ip niuernermi siunertarisanut atornissaanik malitassat pillugit isumaqatigiissusiorsinnaallutik, tak. § 11.

Imm. 4. Naalakkersuisut iluaquteqarniarnermut ingerlatseqatigiiffik piginnaatissinnaavaat niuernermi siunertarisanut akuersissutinik tunniussisinnaasarnissamik, tamatumani aamma ilanngullugit atuinissamik malitassanik sukumiinerusunik aalajangersaasinnaasarnissamik, tak. § 11. Naalakkersuisut iluaquteqarniarnermut ingerlatseqatigiiffimmut taamatut piginnaatitsinertik pisussaaffissatut tunniussinnaavaat. Naalakkersuisut niuernermi siunertarisanut akuersissutinik tunniussisarnermut atatillugu iluaquteqarniarnermut ingerlatseqatigiiffimmut aqutsinerneq atsumik ilitsersuussisussaataapput. Naalakkersuisut taamatut nakkutilliinissamut atatillugu sukumiinerusunik maleruagassiisnaapput.

§ 11. Naalakkersuisut imaluunniit iluaquteqarniarnermut ingerlatseqatigiiffik tamatuminnga

piginnaatitaasoq, niuernermi siunertarisanut akuersissummik § 10 malillugu tunisisoqartillugu akuersissutip atornissaa pillugu malitassanik sukumiinerusunik aalajangersaasinnaapput, assersuutigalugu akiliuteqartarnej, akuersissutit atuuffissaat, qanoq sivisutigisumik atuunnissaat, nalunaarusiortussaataaneq qaqugukkullu atorunnaarnissaannut t malitassat pillugit. Naalackersuisut iluaquteqarniarnermut ingerlatseqatigiiffiup malitassanik pineqartunik aalajangersaasinnaannissaannut tunngavissat pillugit maleruagassanik sukumiinerusunik aalajangersaasoqarsinnaapput.

Imm. 2. Niuernermi siunertarisanut akuersissutit pillugit akiliutissat naatsorsorneqartarput pineqartumut pissutsit atuuttut tunngavigalugit, assersuutigalugu akuersissutip qanoq sivisutigisumik atuunnissaa, atuuffissaa aammalu aningaasatigut iluanaarutigisassat naatsorsuussat tunngavigalugit. Naalackersuisut akuersissutininut akiliutigineqartartussat naatsorsorneqartarnissaannut atatillugu maleruagassanik sukumiinerusunik aalajangersaasinnaapput.

Kapitali 7

Nalunaarusiortoqartarnissaanik piunasaqaat

§ 12. Kinaluunniit misissuinissamut akuersissummik aammalu taamaattoqassappat niuernermi siunertarisanut matumani inatsit malillugu akuersissummik tunineqarsimasoq misissuinissamut akuersissut taamaattoqarpallu aamma niuernermi siunertarisanut akuersissut tunngavigalugit misissuisimanerit ingerlanneqarsimasut, allaaserisatut saqqummiussat assilinerannik aammalu niuernermi siunertarisanut atuisoqarsimasinnaanera pillugit nalunaarusiamik ukiut tamaasa nassiussisassaaq Naalackersuisunut. Naalackersuisut pineqartunit paasissutissat pissarsiat ilisimasanik katersuivimmuut immikkut toqqakkamut aammalu iluaquteqarniarnermut ingerlatseqatigiiffimmuut ingerlateqqissinnaavaat.

Imm. 2. Misissuineq suliniummik pineqartumik naammassisaqarfiumngippat, imaluunniit allatigut pissuteqartumik unitsinneqarsimappat, Naalackersuisunut nalunaarusiortoqassaaq. Nalunaarusiami nassuiaatigineqassapput suliniutip pineqartup siunertaa, killiffia il.il. aammalu ingerlateqqinneqaqqissinnaannginneranut suut pissutaasimanersut.

Imm. 3. Naalackersuisut nalilerpassuk paasissutissat nassiunneqartut imm. 1 aamma 2 malillugit piunasaqaataasut tunngavigalugit suliaasimanngitsut, qaqugukkulluunniit piunasarinnissaavaat nalunaarusiaq pissarsiarineqartoq aammalu suliat ingerlanneqarsimasut pillugit annertunerusumik paasissutissiisoqassasoq.

Imm. 4. Naalackersuisut nalunaarusiaasartussat pillugit maleruagassanik sukumiinerusunik aalajangersaasinnaapput, aamma pineqartut imarisartagarisassaat, toqqorsimatinneqartarnissaat, toqqorsiveqartinneqartarnissaat pissarsiarineqartarsinnaannissaallu pillugit maleruagassat ilanngullugit.

Kapitali 8

Misissuinissamut akuersissummik/imaluunniit niuernermi siunertarisanut akuersissummik atorunnaarsitsineq

§ 13. Naalackersuisut inatsimmi matumani aalajangersakkat malitassallu aalajangiussat pillugit pisussaaffimmik sumiginnaasoqartillugu misissuinissamut akuersissutinik aamma niuernermi

siunertarisanut akuersissutinik atorunnaarsitsillutik utertitsisinnaapput.

Kapitali 9

Pisortat oqartussaasuinit suliat aamma naammitgittaalliutit suliarineqartarnerat

§ 14. Naalackersuisut qinnuteqaatit matumani inatsit malillugu atuuttut pisortat oqartussaasuinit aalajangersimasumit isumagineqartarnissaat pillugu aalajangersaasinnaapput. Naalackersuisut ingerlatsiviup pineqartup aqutsinissaa pillugu sukumiinerusunik maleruagassaliorsinnaapput.

§ 15. Niuernermi siunertarisanut akuersissutit iluaquteqarniarnermut ingerlatseqatigiiffiup aalajangiinera tunngavigalugu tunniunneqarsimasut pillugit naammagittaalliutit Inuusutissarsiornermut Pisortaqaarfimmut tunniunneqarsinnaapput. Naammagittaalliutinik tunniussisinaanermut piffissaliussaq sapaatit akunnerinik sisamanik killeqarpoq, aalajangiinerup naammagittaalliutigineqartup qinnuteqartumut apuunneraniit naatsorsuutigalugu.

Kapitali 10

Pineqaatissiissutit

§ 16. Akiliisitsisoqarsinnaavoq ima pisoqartillugu:

- 1) Uumassusilinnit isumalluutinik misissuinissamut akuersissutinik pissarseqqaarani, tak. § 6, imm. 1 aamma imm.7, pissarsiniarneq, katersuineq imaluunniit misissuineq pisimappat.
- 2) Misissuinissamut akuersissummik, misissuinermit atortussarsianik taakkuluunniit ilaannik imaluunniit misissuinermit paasisatigut angusanik, tak. § 6, imm. 10, tunniussinerit atugassiissuteqarnerilluunniit suugaluartut pisimappata.
- 3) Uumassusilinnit isumalluutinik aammalu taakkunannga misissuisimanermut paasisatigut angusanik niuernerme siunertarisanut atuinerit suugaluartulluunniit pisut niuernerme siunertarisanut akuersissummik pissarseqqaarsimatinnani, tak. 10, imm. 1.
- 4) § 8, imm. 1, aamma 2, aamma § 12, imm. 1 aamma 2, unioqputinneqarpata.
- 5) § 6, imm. 4, aamma § 11, imm. 1, naapertorlugit malitassatut aalajangersakkat qaangiinnarneqarpata.

Imm. 2. Unioqputitsineq suliffeqarfimmit naalagaaffiup, Namminersornerullutik Oqartussat, kommunip imaluunniit kommunit akornanni suleqatigiiffiusumit, kommunalbestyrelsit aamma nunaqarfinni aqutsisut pillugit Inatsisartut inatsisaanni § 64 malillugu pilersinneqarsimasumit, aktianik piginneqatigiiffimmit, (anpartinik) piginneqatigiiffimmit, piginneqatigiilluni ingerlatseqatigiiffimmit assigisaannilluunniit tamakkiisumik ilaannakortumilluunniit pigineqartumit pisimappat suliffeqarfik il.il. pineqartoq taamatut akiliisitaanissamik akisussaatinneqarsinnaavoq. Taamatuttaaq aalajangersakkat aamma atuupput unioqputitsineq Namminersornerullutik Oqartussanit, kommunimit imaluunniit kommunit akornanni suleqatigiiffiusumit, kommunalbestyrelsit aamma nunaqarfinni aqutsisut pillugit Inatsisartut inatsisaanni § 64 malillugu pilersinneqarsimasumit pisimappat.

Imm. 3. Matumani inatsit malillugu peqqussusiatigut aalajangersarneqarsinnaavoq aalajangersakkanik pineqartunik unioqputitsineq akiliisitaanissamik akisussaatsiviusinnaasoq.

Imm. 4. Matumani inatsit malillugu peqqussusiatigut aalajangersarneqarsinnaavoq unioqputitsineq

suliffeqarfimmit naalagaaffiup, Namminersornerullutik Oqartussat, kommunip imaluunniit kommunit akornanni suleqatigiiffiusumit, kommunalbestyrelsit aamma nunaqarfinni aqutsisut pillugit Inatsisartut inatsisaanni § 64 malillugu pilersinneqarsimasumit, aktianik piginneqatigiiffimmit, (anpartinik) piginneqatigiiffimmit, piginneqatigiilluni ingerlatseqatigiiffimmit assigisaannilluunniit tamakkiisumik ilaannakortumilluunniit pigineqartumit pisimappat suliffeqarfik il.il. pineqartoq taamatut akiliisitaanissamik akisussaatinneqarsinnaavoq. Taamatuttaaq aalajangersakkat aamma atuupput unioqqutitsineq Namminersornerullutik Oqartussanit, kommunimit imaluunniit kommunit akornanni suleqatigiiffiusumit, kommunalbestyrelsit aamma nunaqarfinni aqutsisut pillugit Inatsisartut inatsisaanni § 64 malillugu pilersinneqarsimasumit pisimappat.

§ 17. Naalakkersuisut unioqqutitsisoqarsimatillugu isertut aamma atortussiaanngitsutigut pisinnaatitaaffiit pillugit taarsiissuteqartarnissamik aammalu arsaarinnissuteqartarnissamik sukumiinerusunik maleruagassaliorsinnaapput.

Kapitali 11

Atuutilersinneqarnera

§ 18. Inatsit atuutilerpoq ulloq 1. december 2006 aallarnerfigalugu.

Namminersornerullutik Oqartussat, ulloq 20. november 2006

Hans Enoksen

/

Siverth K. Heilmann